

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Nasha Mukht Bharat Abhiyan (Drug Free India Campaign) neih mekah vawiin khan sorkar hnathawk ten Mizoram Secretariat tualah ruihhlo laka fihlim tur leh do turin thu an tiam.
- 2. Hnam Puanzar ngaihhlut inzirtirna 'Har Ghar Tiranga' campaign chu state chhungah neih zui zel a ni .
- 3. India-Singapore Ministerial Roundtable vawi 3 chu vawiin khan New Delhi-ah tan a ni.
- 4. Independence Day vawi 79 na hman turin rampumah inbuatsaihna kalpui mek a ni.



NASHA MUKHT BHARAT

Nasha Mukht Bharat Abhiyan (Drug Free India Campaign) neih mekah vawiin khan sorkar hnathawk ten Mizoram Secretariat tualah ruihhlo laka fihlim tur leh do turin thu an tiam.

Chief Secretary charge la mek Pu H.Lalengmawia kaihruiin Mizoram Secretariat a thawktu officer leh staff thahnem tak an tel a. Hetih rual hian Sawrkar pisa hrang hrangah leh District hrang hrangah he thutiam hi lak a ni bawk.

Sorkar laipui Ministry of Social Justice & Empowerment, Govt of India chuan NMBA hman hian India ram pumpuiah Ruihhlo Do beihpui a thlak mek a. Tun thla chhung hian campaign hi neiin, August ni 13 hi NMBA kum 5 a tlinna champha a nih angin rampumah he thutiam lakna hun hi neih a ni.

BYTE (Sorkar hnathawk Pledge)

Nasha Mukht Bharat Abhiyan Mizoram State Level leh Aizawl District Level bultumin tukin khan Chief Minister Pu Lalduhoma hovin Aizawla School leh College hrang hrang atanga zirlai 600 chuang ten kawng an zawh a, Hmun hnih, Chanmari leh Sikulpuikawn atangin kawng hi zawh a ni a, Lammualah lut khawmin Rally kharna buatsaih zui a ni. Chanmari atanga kawng zawhte hi Chief Minister hian a vailiam a, an zingah tel ve nghalin Lammual thlengin a kal a ni.

A kharna inkhawmah hian thu sawiin Chief Minister chuan, ruihhlo hian eng thil tha mah mi a pek loh avangin, ban phak lekah awm mah se tih ve tur a ni lo a ti

a. A ruka zuarte pawh khawtlangin hnawl ngam se, an phu tawk hremna hmu ngei rawh se a ti a, Mipuite tang tlangin, he thil tha lo tak lakah hian hnam ven him a ngai a ti.

(BYTE:CM)

Tukina kawngzawhte hian ruihhlo thatlohna leh duhlohna thuziak an keng a, an au rual bawh a. Miss Grand India Miss Vanlalnuntluangi kaihhruaiin kal khawmten thutiam an nei bawh.

(BYTE-Students)

Siaha District ah pawh District Level Nasha Mukta Bharat Abhiyan Committee, huaihawtin tukin khan ruihtheihthil laka fihlim tlat tura infuihtharlehnan kawng zawh a ni a, Independence Day parade contingents rehearsal nei zo zirilaite leh official thahnem takin kawng hi an zawh a ni.

<><><>

WOMEN HELPLINE

Mizoram sorkar Women and Child Development hnuaia Women Helpline-te chuan kumin April ni 1 atanga thla hmasa July chhungin Mizoram chhunga hmeichhiate chung a hlei lenna thleng report 7481 an dawng.

Women Helpline Office hotuten Akashvani Aizawl an hrilh danin an report hmuh a kum bithliah a an then hran danah nikum April ni 1 atanga kumin March ni 30 chu report an dawn tam ber tum niin 13,994 an dawng tih an sawi.

Women Helpline Office chhinchhiah danin hmeichhiate chung a hlei lenna hi kum 18 atanga kum 40 ten an tawk nasa bera, hlei lenna tuar nia insawi zinga za a 71 chu hmeichhia kum 18 atanga kum 40 ten tawkin zaa 18 vel chu kum 41 atanga kum 60 inkar an ni.

Women Helpline hotute chuan hmeichhe kum 60 chunglamah pawh hlei lenna tawk an awm tih sawiin hei hi report an dawn zinga zaa 2.5 an ni a, zaa 4.5 chu kum 17 tling lo te chung a thleng a ni.

Kan Correspondent report i lo ngaithla ang :

Voice Cast :

Women Helpline hotute sawi danin hmeichhiate chung a hlei lenna hi thuang hnih domestic leh non- domestic-ah then a ni a, domestic abuse hian kut thlak bakah, hmeichhiate chung a diriamna tawngkam uchuak leh vauna tawngka hman te, suma inbumna bakah mipat hmeichhiat lam hawi leh ruihtheih thil zu leh damdawi hmanga hmeichhe duh lo chung hrai ruihte huamin non domestic violence hian social media hmanga hmeichhe tih mualpho bakah hur herhna lam zawnga hmeichhe chhaih te hmeichhiate remtihna tel lova anmahni dikna chanvo rapbet khawp a an chanchin leh nun hman dan chhui zuite bakah thudik zik thuak lo nun tichhe thei khawp a hmeichhiate beih te a huam a ni.

<><><>

HAR GHAR TIRANGA

Hnam Puanzar ngaihhlut inzirtirna 'Har Ghar Tiranga' campaign chu state chhungah neih zui zel a ni a,

Vawiin khan BJP Mizoram huaihawtin Aizawl ah Har Ghar Tiranga 'Two-Wheeler Rally' neih a ni a, State President Dr. K. Beichhua, MLA in a vai liam a ni.

Dr. K. Beichhua MLA "Har Ghar Tiranga puala Two Wheeler Rally chuan ramchhungm hmun hrang hranga chengte, Chhim tâwp atanga Hmar tâwp thlenga chengte inpumkhat zia lantirna a ni a ti a, British laka Zalenna India in a hmuh hunlaia tha leh zung thawhtute kha vawiinah chuan awm tawh lo mahse, a la dam ho ten mi hmasate aiawha India ram ropui tak hi an enkawl chhunzawm dawn tih hriat thar a ngai a. Chuvangin, India ram hian hma lam a pan zel a, Mizoram ngei pawh hian State dangte ruala hmasawmna kawng a zawh ve zel theih nan inlunguala hma lam pan a ngai a ni," a ti bawk.

(BYTE)

Lungleiah pawh tukin khan District Administration huaihawtin 'Tiranga Yatra' buatsaih a ni a, Independence Day lawmnaa parade contingent turte'n hnam Puanzar kengin kawng an zawh a ni.

Lawngtlaiah chuan tukin Chandmary Square atanga Areopagy, Bazar, inkarah kawngzawhin Lawngtlai khawpui chhunga zirlai naupang, Zirtirtu leh Sawrkar hnathawk thahnem tak an tel thei a ni.

Hnahthialah pawh Har Ghar Tiranga Campaign pualin Hnahthial-a school zirlaiten HDFA Turf ground atanga Nauhruaikawn thleng kawng an zawh a. Heimi rual hian, Ruihhlo Do Beihpui Thlakna - Nasha Mukta Bharat Abhiyaan pualin zirlai naupangte chu Ruihhlo ti lo tura intiamna neihpui an ni bawk.

<><><>

EDUCATION MINISTER SURPRISE VISIT

School Education Minister Dr Vanlalhlana’n vawiin khan Aizawla zirna in thenkhat hrilh lawk lovin a tlawh a, an building dinhmun leh naupangte zirtirna an pek dan a enpui.

School Education Minister hian School pathum ITI High School Adhoc Aided, Salem Veng Primary School I leh MICE Comprehensive School te a tlawh a. ITI High School hi building sak mek la zawh loh hna chawlhsan si a ni a, harsatna an neih leh an hmabak te a thlirpui a. ITI High School hi cheng nuai 64.5 senga sak mek a ni a, Classroom-2, Laboratory room, Library, Headmaster leh Teachers Common room te a ni a, Minister hi ITI High School Headmaster leh zirtirtuten an lo dawngsawng a, tuna an dinhmunah harsatna an neih te an lo thlen a ni.

Minister hian Salem Veng Primary School I tihtawp tawh hmunhma leh building-te a en a, he school building hnuai lam kawngan chu tun dinhmunah khawtlangin Salem veng market atan an hman mek a, a chung lam chu post office leh thil dang atan an hman a ni. Minister hian MICE School Tuikual a mi chu a en bawk a, Classroom leh Smart Classroom te, ICT room te, library leh Vocational Education classroom te a tlawh kual a, hmeichhe naupangten self defence an zir mekah buaina an tawh thulha mahni inven dan an lo entir bawk.

<><><>

NDMA

Mizoram tlawha lo zin mek, National Disaster Management Authority (NDMA) hotute leh Champhai District Disaster Management Authority chu vawiin khan DC Conference Hall-ah thukhawmin chhiatrupna laka invenghim tura tih tawh te, tih tur te leh tih dan tha an sawi ho a ni.

NDMA lam atangin Pu Ranjan Kumar Borah chuan NDMA hmalakna te, Disaater Management Act siamthat a nih dan te, district level atanga international level thlenga chhiatrupna thleng tur ven nana thawhhona neih dan tur te a sawi a. Champhai DDMA atangin SDC Pu Lalchhuanawma Ralte leh Khawzawl DDMA atangin SDO (Sadar) Pu Suvigya S. Chandra te'n district hmalakna te, chhiatrupna thlen thulha bungrua, motor an neih dan leh an inrin dan te, harsatna leh mamawhna an neih hrang hrang te an sawi bawk.

NDMA hotute hian naktukah Champhai Vengsang, Bethel leh NH-06 kalkawnga leimin an en dawn bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

INDIA-SINGAPORE ROUNDTABLE

India-Singapore Ministerial Roundtable vawi 3 chu vawiin khan New Delhi-ah tan a ni. Union Minister Dr.S.Jaishankar, Nirmala Sitharaman, Ashwini Vaishnaw leh Piyush Goyal te sawrkar aiawhin an tel a. Singapore atangin Deputy Prime Minister Gan Kim Yong leh Foreign Affairs Minister Josephine Teo te an tel a ni.

External Affairs Ministry chuan Ministerial Roundtable chu India-Singapore thawhdunna kawngah hmalakna dangdai tak anih thu a sawi a. Ram pahnih inkara thawhdunna thar awm thei hrang hrangte an ngaihtuah dawn a ni.

<><><>

I-DAY PREPS

Independence Day vawi 79 na hmang turin rampumah inbuatsaihna kalpui mek a ni a.Independence Day inpuahchahna pualin ramchhung hmun hrang hrangah hnam puanzar chawilar kawnga hmalakna Har Ghar Tiranga Campaign neih a ni a. Vawiin khan hemi campaign pual hian Union Home Minister Amit Shah pawhin a chenna inah hnam puanzar a zar a. Union Agriculture Minister Shivraj Singh Chouhan pawhin Har

Ghar Tiranga hi zawm vein hnam puanzar a zar bawk a. Anni bakah
hian hrwaitu hrang hrangten Har Ghar Tiranga hi an hmang ve a ni..

